

Communicaziun a las medias – Cussegl dal public SRG.R – 01/2018**Il Cussegl dal public SRG.R attesta ad RTR ina buna qualidad linguistica**

Mustér, ils 22-02-2018

En si 'emprima seduta da l'onn 2018 ha il Cussegl dal public SRG.R analisà il project naziunal «+3» dal november 2017 e prendì sut la marella la qualidad linguistica da RTR. L'emprima scuntrada dal cussegl è medemamain stada la davosa tschentada avant la votaziun davart l'iniziativa No Billag. Il Cussegl dal public è conscient da las consequenzas fatalas ch'in gea a questa iniziativa avess en spezial era per RTR.

La fin da november han las quatter unitads da la SRG SSR (SRF, RTS, RSI e RTR) tractà durant ina saira la tematica en connex cun il stgaudament dal clima e tschentà la dumonda «Tge capita, sche la media da la temperatura mundiala s'augmenta per trais grads?» En in'emissiun da televisiun, durant la quala RTR ha emess passa trais uras sin SRF info, han las quatter unitads nizzegià vicendaivlamain sinergias cun mussar exempels da situaziuns localas (Arena Alva a Laax, Engiadina Bassa) e lur consequenzas actualas. Plinavant han tut las unitads già contact ina cun l'otra durant il temp d'emissiun, partì las emeziuns e discurrì davart la tematica. Grond pais è er vegnì dà a l'interacziun via rait sociala «Twitter» cun il public a chasa. Cussegliera guvernativa Barbara Janom Steiner e la scriventa Romana Ganzoni han discutà e commentà per RTR questas contribuziuns. En il studio èn differents experts dal clima stads preschents ed han participà a las discussiuns. Spezialmain persvadì tar RTR ha la moderaziun d'Andri Franziscus. A moda empatica e suverana ha el manà tras la saira. La contribuziun da RTR davent da Laax cun la moderaziun d'Annina Campell è medemamain vegnida ludada. Gist in tal project naziunal è in bun mussament per in ferm service public.

Qualidad linguistica tar RTR

Il Cussegl dal public SRG.R attesta ad RTR ina buna cumpetenzza linguistica. Sa chapescha sa distinguan la profunditad ed il stgazi da plects da las contribuziuns dal gener da novitad: Fatgs culturals lubeschan per exempel ina pli vasta profunditad ch'ina reportascha da sport. Fastidis fan per il pli il diever da germanissem ed il diever correct da la sintaxa en las construcziuns. Il post da scolaziun linguistica en Chasa RTR è conscients da quest fatg e curregia nua ch'i fa basegn.

Ils proxims temas

Enfin la proxima seduta dals 9 da matg 2018 sa fatschenta il Cussegl dal public cun las reportaschas davart il Surselva-Jam («livestream»), da la votaziun dals 4 da mars (RR, TvR, online) e dal Maraton engiadinais ils 11 da mars (RR ed online).

Dapi 25 onns accompogna ed observa il Cussegl dal public SRG.R tut ils products da RTR. Qualitad ed objectivitat gaudan tar RTR adina absoluta prioritad. Che quai è grategià fitg bain mussa era il fatg ch'igl ha dà en tut quests onns sulettamain duas intervenziuns tar l'organ d'intermediaziun che decida, sch'igl è vegnì rapportà da moda nuncorrecta d'in fatg u betg. En omadus cas n'èsi betg vegnì dà suatientscha a la reclamaziun. RTR persvada cun ses engaschi cumplain en las regiuns e per las regiuns. In'acceptanza da l'iniziativa No Billag muntass in naufragi total, spezialmain per il linguatg rumantsch. Per quest motiv sa dosta l'entir Cussegl dal public SRG.R cun tutta forza cunter questa iniziativa che metta en dumonda ils princips fundamentals da convivenza da l'entira Svizra.

Infurmaziuns davart il Cussegl dal public SRG.R

Il Cussegl dal public è in gremi consultativ independent ch'accompogna la lavur ed il svilup dal program da RTR Radiotelevision Svizra Rumantscha cun constataziuns e propostas. Il Cussegl dal public sa raduna per regla quatter giadas ad onn. El observa singulas purschidas da program, emissiuns ed offertas online da RTR. Il Cussegl dal public SRG.R procura per in stretg contact tranter ils responsabels dal program ed il public. El sa cumpona da 15 commembers.

Per dumondas ed ulteriuras infurmaziuns:

Roger Tuor, president dal Cussegl dal public SRG.R, telefonin 079 436 34 87

Sandra Carisch-Killias, secretariat SRG.R, telefon 081 255 79 79